

REGIONAL NEWS

HEADLINES:-

1. Aizawl Municipal Corporation (AMC) ward number 19-na leh Sakawrtuichhun Local Council by-election-ah ah vawiin khan boruak muanawm tak hnuaiah vote thlak a ni.
2. LAD Minister Pu C. Lalsawivunga, hovin The Mizoram (Village Councils) Bill 2024 chungchang ngaihtuahin vawiin khan MINECO ah thutkhawm a ni.
3. Mizoram atanga Lok Sabha MP atana thlan Pu Richard Vanlalmangaiha chu vawiin khan Lok Sabha thutkhawmah rinawmna thutiam tira lakluh a ni.
4. BJP MP senior leh sawrkar hmasaa Lok Sabha Speaker ni bawk Om Birla chu NDA chuan Speaker atan rawt nawn leh.

<><><>

AMC BY ELECTION

Aizawl Municipal Corporation (AMC) ward number 19-na leh Sakawrtuichhun Local Council by-election-ah ah vawiin khan boruak muanawm tak hnuaiah vote thlak a ni a, Vote hi tukin dar 7 atanga tlai dar 5 thleng vote thlak a ni.

Vawiina AMC Ward number 19- a By-Election-ah hian vote 7345 a tla a, hei hi za zela 55.04 a ni.

Kan corr in a tlawh kualnaah vote thlaktu te an phur hle a, boruak a muanawm a a felfai tih vote thlaktu ten an sawi a ni.

Vawiin vek khan Sakawrtuichhun Local Council(LC) by-election neih a ni a. Sakawrtuichhunah hian voter 1665 ah voter 837 in vote an thlak a, vote hi zaa 50.27 a tla a ni. Tlai dar 5 thleng khan vote thlak hun hi hawn a ni.

AMC ward number 19-na hi hmeichhe bial a ni a, a bialtu hmasa Baryl Vanneihsang chu MLA atan thlan tlin anih avangin a hmun ruak luah tur thlan a ni. Ward 19-na chhungah hian veng hrang hrang - Kulikawn, Tlangnuam, Tlangnuam Vengthar, Saikhamakawn, Melthum leh Hlimen te an awm a, vote tla te hi June ni 27, tunkar Ninganiah chhiar a ni dawn a. Sakawrtuichhun Local Council by-election-a vote tlate chu vote thlak zawh rualin chhiar nghal a ni ang.

<><><>

CM

Serchhip Town Development Committee Member 14 leh an Chairman Pu Rozamliaana ZPM Serchhip Block President hovin vawiin khan Chief Minister Office ah Chief Minister Pu Lalduhoma an hmu a, Chief Minister hnen ah hian Serchhip khawtlang hmasawna tur hrang hrang an thlen.

Chief Minister Pu Lalduhoma chuan an dilna te tha tak bawhzui a tum thu a hrilh a, Serchhip Dist Hospital sakna tur Cheng Vaibelchhe 21 in adaih lohna bak chu CSR Fund dilna tur ahre tawh tih sawiin, Sum sen ngai zat tur hriat chian anih hunah dilna a thehluh tur thu a sawi a, Serchhip Press Club sakna tur pawh ngaihtuah anih tur thu sawiin, Serchhip Sub Hqrs MHIP ten Golden Jubilee an lawman tura sum an dilna pawh Cheng Nuai 2 a pek tur thu a sawi bawk.

MIZORAM VC BILL 2024

LAD Minister Pu C. Lalsawivunga, hovin The Mizoram (Village Councils) Bill 2024 chungchang ngaihtuahin vawiin khan MINECO ah thutkhawm a ni a.

VC te chu The Lushai Hills District (Village Councils) Act 1953 hnuai inenkawl an la ni a, he dan hi a hlui tawh avang leh khawtlangin a mamawh tawh lem loh a tam bakah thil thar belh tur leh tihdanglam tur a awm tawh avanga he VC Draft Bill 2024 hi lo irhchhuak a nih thu tarlan a ni a. VC member a hmeichhe reservation leh VC term rei zawng chungchang sawiho a ni bawk.

He draft bill, The Mizoram (Village Councils) Bill 2024 chungchang inrawnkhawmna-ah hian VC member-te tam zawng hi chenna in awm zat ni lovin mihring cheng zat atanga the ni tawh se tih a ni a. VC Secretary atan hian Sorkar hnathawk angin special recruitment awm thei se tih a ni bawk. Meeting-ah hian VC thiah hun, thiah dan leh an hnathawh tur bakah an thuneih dan tur te sawiho nghal a ni bawk.

Meeting-ah hian Pu Lalmanpuia Punte, MLA, Advisor to CM (Political) pawhin VC Draft Bill 2024 a belh tur leh paih tur ngaihdan a sawi bawk a ni.

He dan hi Assembly-in a pass chuan Municipality te bakah Autonomous District Council huam lovin Mizoram pumah hman tur a ni ang a. He thutkhawmah hian member te'n ngaihdan leh duhdan an neih te sawi vek sen a nih loh avangin LAD Secretary hnenah an ngaihdante ziaka thlen a, Drafting Committee-in a khaikhawm a tan tih a ni a. Chumi atanga thla khat hnuah thutkhawm leh nise tih a ni bawk.

Meetingah hian Political Party aiawh hrang hrang BJP, Congress, MNF, bakah MUP, Central YMA, All Mizoram VC Association, khawtlang inrelbawlna lama mithiam Pensioners aiawhte, Drafting Committee Member, LAD Secretary bakah LAD Dept. Official te an tel a ni.

<><><>

LUNGLEI MC& LC MOU

Lunglei Municipal Council huam chungah lirthei tlan dan mumal zawk kalpui turin Lunglei Municipal Council leh Local Council ten vawiin khan inremna thuthlung an ziaak a,

LMC Chairman, Pu Lalzuithanga kaihhruai he inkhawmah hian LMC aiawhin Pu Donny Lalruatsanga, Chief Executive Officer (CEO) leh Local Council Chairman 23 ten inremnaah hian an hming an ziaak a ni.

Lunglei Municipal Council huam chungah kawngpuite a thawl zawk theih nan leh mipui te an him zawk theih nan te, kawngkama lirthei dah avanga lirthei chetsualna awm thin te a ziaawm theih nan Lunglei Municipal Council leh LMC Area huam chungah Local Council te chuan thawhdunna thuthlung siam an rem ti a. An thawhhona tur hrang hrang duan nghal a ni.

<><><>

BUYER/SELLERS MEET:AYUSH

Ramhmul Damdawi leh hnim hnah atanga damdawi siamchhuah hmanga sumdawng tura hmalakna, 'State Level Buyers-Sellers Meet for Medicinal and Aromatic Plants chu vawiin khan Aijal Club ah neih a ni a.

He buyers-sellers meet hi sorkar laipuaia Ministry of AYUSH hnuai National Medicinal Plants Board (NMPB) bultuma State Medicinal Plants Board (SMPB), Mizoram, Directorate of AYUSH in a buatsaih a ni.

He hun hmanpuitu Health & Family Welfare Minister Pi Lalrinpuii chuan thu sawiin, ramhmul damdawi chu hnam rohlu pakhat leh tangkai em em a ni a, a tangkaina te haichhuak belh zelin, kuthnathawktute tan leh economy chawikangtu pawimawh a nih theih a beisei a ti a. He Buyer-Sellers meet hian Mizorama ramhmul damdawi chingtute leh la ching ve duhte tan market tha tak a hawn phah a, hlawkna tha tak chharchhuah a nih ngei a beisei thu a sawi a ni.

Minister chuan kuthnathawktute chawikan chu sawrkarin a ngaihpawimawh thu sawiin, Handholding Policy chuan medicinal plants farmer te pawh a la huam tel thuai a beisei thu a sawi.

Buyer-Seller-meet hawna inkhawmah hian National Medicinal Plants Board, Ministry of AYUSH leh CSIR-North East Institute of Science & Technology, Jorhat, Assam aiawh lo kal te'n thu an sawi bawk a. Mizoram AYUSH chu India state zinga Integrated Component Project kalpui hmasa ber a nih thu te an sawi a. Mizoram leilung chu medicinal plants leh aromatic plants chinna atan a that thu leh, tam tham tak a tharchhuak thei tan chuan hralhna lamah lungkham tur a awmlh thu te an sawi a ni.

<><><>

LUNGLEI SOUTH MLA SURPRISE VISIT

Lunglei South bialtu MLA Pu Lalramliana chuan vawiin khan a bial huamchhunga School Lunglawn, Luangmual, Sethlun leh Theiriath School thenkhat chu sawi lawk lovin a tlawh a.

Lunglawn atanga tan in Lunglawnah hian School pathum Lunglawn Govt Primary, Middle leh High School, Luangmual-ah School pahnih Govt Primary leh Middle, Sethlunah Sikul pahnih Govt Primary leh Middle school te bakah Theiriath Govt Darphawka Memorial Middle School te tlawhin hun a hmang a ni.

MLA chuan heng School a tlawh chhan chu, 'School in harsatna an neihte a theih chin chinah a hmun ngeia hmuhpui chu Bialtu a nihna anga tula a hriat thu te, sorkar in ai-kal lak a khap chungchangah zawm a nih dante hmuhpui a tula a hriat thu sawiin a School tlawh chinah Ai-kal sawi tur an awm ta rih lo chu lawmawm a tih thu a sawi a. Casual teacher lak tharte school mamawh dan a zira semruat tum a ni tih sawiin, sorkar tharah inthlahdah a rem dawn lova, Health dept. leh Education dept te chu thingtlang kilkhawr ber thlenga thawktu awm an nih avangin vil ngun bik tula a hriat thute a sawi a ni.

<><><>

LOK SABHA OATH TAKING

Mizoram atanga Lok Sabha MP atana thlan Pu Richard Vanlalhmangaiha chu vawiin khan Lok Sabha thutkhawmah rinawmna thutiam tira lakluh a ni.

MP Lok Sabha 18-na MP thlan tharte lakluh inkhawm hi vawiinah chhonzawm a ni a. Vawiina MP atana lakluh zingah hian Uttar Pradesh-a Rae Bareilly bial atanga thlan tlin Congress hruaitu Rahul Gandhi pawh a tel a. Opposition hruaitu langsar tak tak Akhilesh Yadav, Mahua Moitra, Supriya Sule leh Kanimozhi te pawh MP lakluh zingah hian an tel a ni.

Nimin khan Prime Minister Narendra Modia Lok Sabha MP atan rinawmna thu tiam tira lakluh a ni tawh a. PM Modia bakah hian Union Minister te Rajnath Singh, Amit Shah, Nitin Gadkari, Shivraj Singh Chouhan, Manohar Lal, Piyush Goyal, Jitanram Manjhi, Rajiv Ranjan alias Lallan Singh, Dr Virendra Kumar, Kiren Rijiju, Chirag Paswan, Jyotiraditya Scindia, Annapurna Devi te pawh lakluh zingah an tel a.

MP lakluhte hian Hindi leh English bakah hian Telugu, Assamese, Bangla, Malayalam, Gujarati, Sanskrit, Kannada, Odia, Dogri leh adangte hmangin rinawmna thutiam hi an la a ni.

<><><>

LOK SABHA SPEAKER

BJP MP senior leh sawrkar hmasaa Lok Sabha Speaker ni bawh Om Birla chu NDA chuan Speaker atan rawt nawn leh a. Vawiin khan Pu Birla hian nomination a thehlut nghal a ni. Hetihlai hian opposition INDIA bloc chuan Lok Sabha Speaker atan hian MP senior Kodikunnil Suresh an rawt ve thung a. Pu Suresh-a hian vawiin vek khan nomination a thehlut a ni. NDA leh INDIA bloc te hi Lok Sabha Speaker tur chungchangah an inbiakrem theih loh avangin a hran ve vein nomination an siam phah a. Tun tum hi Lok Sabha-ah Speaker post inchuha inthlan a awm hmasak ber a ni dawn a ni. Lok Sabha Speaker hi naktukah thlan a ni ang.

<><><>